

唐太古妙應孫真人福壽論

聖人體其道而不為也。賢人知其禍而不欺也。達人斷其命而不求也。信人保其信而靜守也。仁者守其仁而廉謹也。士人謹其士而謙敬也。凡人昧其理而苟非為也。愚人執其愚而不憚也。小人反其道而終日為也。

福者。造善之積也。禍者。造不善之積也。鬼神。蓋不能為人之禍。亦不能致人之福。但人積不善之多而煞其命也。富貴者。以輕勢取。為非分也。貧賤者。以佞盜取。為非分也。神而記之。人不知也。夫神記者。明有陰籍之因。又按黃庭內景云：夫人有萬餘神。主身三尸九蟲。善惡童子錄之奏上。況有陰冥之籍也。愚癡之人。神不足。神有餘者。聖人也。亦不可一二咎而奪其人命也。亦有爵被人輕謗。及暴見貶黜。削其名籍。遭其橫病者。多理輔不法所致也。理輔不正不死者。其壽餘祿未盡也。正理輔而死者。筭盡也。

貧者多壽。富者多促。貧者多壽。以貧窮自困。而常不足。不可罰壽。富者多促。而奢侈有餘。所以折其命也。乃天損有餘而補不足。亦有貧賤、饑凍、曝露其屍不葬者。心不吉之人也。德不足。是以貧焉。心不足。是以死焉。天雖然不煞。自取其斃也。不合居人間。承天地之覆載。戴日月之照臨。此非人者也。故有官爵之非分。車馬之非分。妻妾之非分。有屋宇之非分。粟帛之非分。貨易之非分。則神而記之。三年。五年。十年。二十年不過此。過此。神而追之則死矣。

官爵之非分者. 崎嶇而居之. 賄賂而得之. 德薄而執其位. 躁求而竊其祿. 求其躁取而必強. 強而取之非分也. 即有災焉、病焉、死焉. 神而記之. 人不知也.

車馬之非分. 市馬悵其價. 而馬欲其良. 水草而不時. 鞭勒而過度. 奔走而不節. 不知驅馳之疲. 不知遠近之乏. 不護嶮阻之路. 畜不能言. 天哀力竭. 此非分也. 神已記之. 人不知也.

妻妾之非分者. 所愛既多. 費用必廣. 淫泆之道. 必在驕奢. 金翠之有餘. 蘭膏之有棄. 惡賤其紋綵. 獸飫其珍羞. 人為之難. 尔為之易. 人為之苦. 尔為之樂. 此非分也. 神已記之. 人不知也.

童僕之非分者. 以良為賤. 以是為非. 苦不憫之. 樂不容之. 寒暑不念其勤勞. 老病不矜其困憊. 鞭撻不問其屈伏. 陵辱不問其親疏. 此非分也. 神已記之. 人不知也.

屋宇之非分者. 人不多構其廣廈. 價不厚而罰其工. 人以不義之財. 葺其無端之舍. 功必至. 飾必明. 斤斧血力. 木石勞神. 不知環堵之貧. 蓬戶之陋. 此非分也. 神已記之. 人不知也.

粟帛之非分者. 其植也廣. 其穫也勞. 其農也負. 其利也倍. 蓄乎巨廩. 動餘歲年. 盜賊之羈縻. 雀鼠之巢穴. 及乎困農負債. 利陷深窞. 此非分也. 神已記之. 人不知也.

衣食之非分者. 紋綵有餘. 餘而更製. 箱篋之無限. 貧寒之不施. 不念保露之凌布素之不足. 以致蠹魚鼠口香醜腐爛.

此非分也。神已記之。人不知也。

飲食之非分者。一食而其水陸。一飲而取其弦歌。其食也寡。其費也多。世之糠糲不充。此以膾膩有棄。縱其僕妾。委擲溼塗。此非分也。神而記之。人不知也。

貨易之利厚。不為非分。利外尅人。此為非分。接得非常之利者。祥也。小人不可以輕而受之。其所鬻者賤。所價者貴。彼之愚而我之賊。賊而得之者。禍也。倖而得之者。災也。分而得之者。吉也。屈而得之者。福也。

夫人之死。非因依也。非痾瘵也。蓋以積不仁之多。造不善之廣。神而追之則矣。人若能補其過。悔其咎。布仁惠之恩。垂憫恤之念。德達幽冥。可以存矣。尚不能逃其往負之災。不然者。其禍日多。其壽日促。金之得盈。福之已竭。且無義之富。血屬共之。上之困焉。下之喪焉。如此者。於我如浮雲。不足以為富也。

人若奉陰德而不欺者。聖人知之。賢人護之。天乃愛之。人以悅之。鬼神敬之。居其富而不失其富。居其貴而不失其貴。禍不及也。壽不折矣。攻劫之患去矣。水火之災除矣。必可保生全天壽矣。

唐太古妙應孫真人福壽論終

（唐·孫思邈撰）

底本出处：《正統道藏》正一部

文物出版社、上海书店、天津古籍出版社联合影印

1988 年版 第三十四册 466 页

断句依照：《中华道藏》正一部

华夏出版社 2004 年版 第四十二册 660 页）